

आकाशवाणी

1. केन्द्री गृहमंत्री अमित शाह होर जम्मू कश्मीर दे मजूदा सुरक्षा हालात ते औंदी श्री अमरनाथे दी यात्रा लेई तैआरिएं दा जायजा लैने लेई अज्ज इक उच्ची सतह दी बैठक ला करदे न।
2. उपराष्ट्रपति जगदीप धनखड़ होर अज्ज संसद भवन परिसर च नमें बनाए गेदे “प्रेरणा स्थल” दा उद्घाटन करगन।
3. प्रधानमंत्री नरेन्द्र मोदी होरें कच्छ च 2001 च आए दे भूचाल च मारे गेदे लोकें दे चेते च बनाए गेदे म्यूजियम “स्मृति वन” गी यूएनईएससीओ दे प्रतिष्ठित प्रिक्स वर्सेल्स म्यूजियम 2024 पुरस्कार लेई चुने जाने पर ममारकबाद दित्ती।
4. “वंदे भारत” ट्रेन च स्लीपर क्लास दी सुविधा दे ट्रायल औंदे 2 महीने च शुरू होई जांगन।
5. उत्तर ते मध्य भारत दे ज्यादातर हिस्से च अगले त्रऊं—चऊं दिनें तगर गर्मी कोला राहत हासल होने दे कोई असार नेई। मौसम विभाग नै ऑरेंज ते रैड अलर्ट जारी कीता।
6. कजान, रूस च चला’रदिएं ब्रिक्स खेड्डें च भारतीय महिला टेबल टेनिस टीम नै मुल्खै लेई पैहला तगमा हासल कीता।

<><><><><><>

Amit Shah

गृहमंत्री अमित शाह जम्मू कश्मीर च सुरक्षा स्थिति ते श्री अमरनाथ जी दी यात्रा दी तैआरिएं दी समीक्षा करने आस्तै अज्ज बडलै इक उच्च स्तरीय बैठक करगन। एहदे च जम्मू कश्मीर दे उपराज्यपाल मनोज सिन्हा, राष्ट्री सुरक्षा सलाहकार अजीत डोभाल, केन्द्र गृह सचिव, सेना, पुलस ते जम्मू कश्मीर प्रशासन दे वरिष्ठ अधिकारी शामिल होंगन। एहदे शा पैहले शुक्रवारें शाह होरें नमीं दिल्ली च गृह मंत्रालय दे वरिष्ठ अधिकारिएं कन्नै बैठक च जम्मू कश्मीर दी सुरक्षा स्थिति दा जायजा लैता हा।

<><><><><><>

Lok Sabha

नमीं लोकसभा दा पैह्ला सत्र 24 जून थमां शुरू होग। संसदीय कार्य मंत्री किरिन रिजिजू होरें आखेआ ऐ जे सरकार संसद दे कम्मकाज गी सेई ढंगै कन्नै चलाने आस्तै सारे राजनीतिक दलें ते सांसद कन्नै रलियै कम्म करने गी तैआर ऐ। नमीं संसद दे पैहले सत्र च नमें चुने गेदे सांसदें गी सगंध चकाना, लोकसभा अध्यक्ष दा चुनां ते दौनें सदनें दी बैठक च राष्ट्रपति हुंदा अभिभषण होने दी परम्परा ऐ।

<><><><><><>

Vice President

उपराष्ट्रपति ते राज्य सभा दे अध्यक्ष जगदीप धनखड़ होर अज्ज संसद भवन परिसर च बने दे नमें प्रेरणा स्थल दा उद्घाटन करगन। लोकसभा दे स्पीकर ओम बिरला, राज्य सभा दे उपाध्यक्ष हरिवंश नारायण सिंह ते संसदीय मामले दे मंत्री किरन रिजिजू होर इस उद्घाटन समारोह च खास तौर पर मजूद रौंहगन। राज्य सभा ते लोकसभा दे सारे सदस्यें गी इस कार्यक्रम च शामिल होने दा साददा दित्ता गेआ ऐ। प्रेरणा स्थल वरिष्ठ लोकें ते औने आले दी सहूलियत आस्तै बनाया गेआ ऐ जेह्दे करी महान नेताएं ते स्वतंत्रता सेनानिएं दी प्रतिभाएं गी संसदीय भवन परिसर दे अंदर गै श्रद्धाजुलि भेंट कीती जाई सकोग।

<><><><><><>

PM Modi

प्रधानमंत्री नरेन्द्र मोदी होरें गुजरात दे भुज च बनाए गेदे स्मृति वन अर्थक्वेक मेमोरियल म्यूजियम गी यूनेस्को दी तरफा प्रतिष्ठित प्रिक्स बर्सेल्स पुरस्कार लेई ताले जाने च खुशी प्रगट कीती ऐ ते आखेआ ऐ जे एह समूलचे मुख्यै लेई इक मान्नै आली गल्ल ऐ। इस म्यूजियम दा निर्माण 2001 च आए दे भूंचाल च मारे गेदे लोकें दे चेते च कीता गेआ हा। प्रधानमंत्री मोदी होरें अपने सोशल मीडिया पोस्ट च लिखेआ जे कच्छ च स्मृति वन उनें लोकें लेई श्रद्धांजलि ऐ जिनेंगी असें 2001 च खोफनाक भूंचाल कारण मोहाई दित्ता हा। उनें आखेआ जे इस म्यूजियम गी प्रिक्स बर्सेल्स म्यूजियम 2024 लेई विश्व सतह पर तालेआ जाना इक मान्नै आली गल्ल ऐ।

<><><><><><>

Vande Bharat

वंदे भारत स्लीपर क्लास ट्रेन दी अजमैश करने आले ट्रायल अगले दऊं महीने च शुरू होई जांगन। फिलहाल वंदे भारत एक्सप्रेस च शड़ी चेयर कार दी सुविधा उपलब्ध ऐ। रेल मंत्री अश्विनी वैष्णव होरें नमीं दिल्ली च जानकारी दित्ती जे लोकें पास्सेआ वंदे भारत स्लीपर ट्रेन चलाने दी लम्मे चिरै थमां मंग कीती जा'रदी ही। एह भारत दी पैहली मुल्खै च बनी दी सेमी हाई स्पीड ट्रेन ऐ।

<><><><><><>

PM Kissan

प्रधानमंत्री नरेन्द्र मोदी होर मंगलवार गी पीएम-किसान सम्मान निधि योजना दे तैहत् 20 जहार करोड़ रुपे बंडगन। राई-बाई मंत्री शिवराज सिंह चौहान होरें आखेआ ऐ जे एह राशि 9 करोड़ 3 लक्ख करसानें दे खाते च पाई जाग। नमीं दिलली च चौहान होरें आखेआ जे पिछले 10एं ब'रें च अजें तोड़ी 11 करोड़ करसानें दे खातें च 3 लक्ख करोड़ रुपे भेजे जाई चुके दे न। उनें कार्यक्रम च शामिल होने आस्तै सारे मुख्यमंत्रिणें गी चिट्ठी लिखी ऐ। प्रधानमंत्री होरें काशी दे कार्यक्रम दे कन्नै देश दे बक्ख-बक्ख थाहरें पर बक्ख-बक्ख केन्द्री मंत्री जांगन, वर्चुअल कार्यक्रम कन्नै जुड़गन ते उत्थें किट्ठे होए दे करसानें कन्नै गल्लबात करगन। सारी मंडिणें च ब्लाक थाहरें पर ते मते राज्यें दे हर इक ग्रां च कार्यक्रम दा आयोजन होआ'रदा ऐ ते तकरीबन 2 करोड़ करसान फिसीकली ते वर्चुअली इस कार्यक्रम च शामिल होंगन।

<><><><><><>

President

राष्ट्रपति द्रौपदी मुर्मू, उपराष्ट्रपति जगदीप धनखड़, प्रधानमंत्री नरेन्द्र मोदी ते गृहमंत्री अमित शाह होरें रूद्रप्रयाग हादसे च मारे गेदे लोकें आस्तै बसोस जताया ऐ। मोदी होरें हादसे च मरने आले दे परिजनें गी प्रधानमंत्री राश्ट्री राहत कोष थमां 2-2 लक्ख रुपे अनुग्रह राशि देने दी घोषणा कीती ऐ। जियां गै पैहले बी दस्सेआ गेआ हा जे उत्तराखंड दे रूद्रप्रयाग जिले च बद्रीनाथ राश्ट्री जरनैली शिड़कै पर रेनतोली दे कोल 1 गड्डी दे डूंहगे खड्डे च

पेई जाने करी 14 तीर्थयात्रुएं दी मौत होई गई। हादसे च गंभीर तौर पर घायल 7 लोकें गी हवाई रस्ते थमां ऋषिकेश च अखिल भारती आर्युविज्ञान संस्थान पजाया गेआ ते दुए 7 घायलें दा इलाज जिला अस्पताल च चला'रदा ऐ।

<><><><><><>

Sikkim

सिक्किम दे मुख्यमंत्री प्रेम सिंह तमांग होरें नामची जिले दे रंगाग यांगंग च पस्सियां पौने आली थाहर माजुआ दा जायजा लैता। उत्तरी सिक्किम च फसे दे पर्यटकें गी खराब मौसम दे कारण हवाई मार्ग दा नेई कड़डेआ जाई सकेआ। सीमा सड़क संगठन संपर्क ब्हाल करने आस्तै कम्म चला'रदा ऐ। पस्सी पौने करी 3 लोकें दी मौत होई गई ऐ। मुख्यमंत्री होरें मारे गेदे लोकें दे परिजनें गी अद्धा एकड़ राई—बाई लायक जिमीं ते 5—5 लक्ख रपे देने दी घोषणा कीती ऐ।

<><><><><><>

Heat Wave

देश दे उत्तर ते मध्य क्षेत्र च जबरदस्त गर्मी दा प्रकोप बरोबर जारी ऐ। मौसम विभाग मूजब अगले चऊं दिने तोड़ी ऐसी गै स्थिति बनी दी रौहने दे आसार न। मैहकमे नै अगले 5एं दिनें लेई दिल्ली ते उत्तर प्रदेश च गर्मी दे जारी रौहने दी पछोकड़ै च दिल्ली ते उत्तर प्रदेश लेई रैड अलर्ट जारी कीता ऐ। लोकें गी दपैहरी लै बिना वजह घरै बाहर नेई निकलने ते लोड़चदे सब्बै एहतियाती उपाए बरतने लेई आखेआ गेआ ऐ। उत्तर प्रदेश दे प्रयागराज च गर्मी नै 127 साल दा रिकार्ड त्रोड़ी दित्ता ऐ ते उत्थें कल दा घट्टोघट्ट तापमान 34.3 डिग्री सैल्सियस दर्ज कीता गेआ। मौसम विभाग नै पच्छिम बंगाल ते ओडिशा लेई ऑरेंज अलर्ट जारी कीता ऐ।

<><><><><><>

Film Festival

मुंबई अंतर्राष्ट्रीय फिल्म महोत्सव कल मुंबई च शुरू होई गेआ। इस मौके पर सूचना ते प्रसारण राज्य मंत्री एल.मुरुगन, अदाकार रणदीप हुड्डा, निर्देशक मधुर भंडारकर, अदाकारा

सोनाली कुलकर्णी ते दिव्स दत्ता मजुद हियां। उद्घाटन समारोह च इक भारतीय “लौहकी फिल्म” Sun Flowers wev the First Ones to know दस्सी गई। इस फिल्म गी कान्स फिल्म महोत्सव च ला सिनेफ पुरस्कार हासल होई चुके दा ऐ। इस मौके वन्य जीवन बारे फिल्मा बनाने आले फिल्म निर्माता सुब्बेया नल्ला मुथू होरें गी बी शांताराम लाइफ टाइम अचीवमेंट अवार्ड दित्ता गेआ।

<><><><><><>

BRICS

वजान रूस च चला'रदी ब्रिक्स खेड्डें च भारत नै पैहला तगमा हासल कीता। भारती महिला टेबल टेनिस टीम जेहदे च पोएमाटी बाएसा, माऊमीता दत्त ते याशिनी सीवासंकर शामिल हियां, नै कैह दा तगमा अपने ना कीता। भारती महिला टेबल टेनिस टीम चीन कोला 1–3 कन्नै हारी। यशिनी नै 11–7, 4–11, 11–8, 7–11, 11–2 अंक कन्नै बढ़त बनाई लेई पर चीन नै बाकी राउंड च जित्त हासल कीती। नमें नियुक्त कीते गेदे खेड्ड मंत्री मनसुख मांडवीया होरें भारतीय महिला टीम गी मुबारकबाद दित्ती ऐ। भारती मर्दे दी टीम जेहदे च अनिरबन घोष, जीन चन्द्र ते स्नेहजीत, सुरावाजुना होर शामिल न, नै बहरीन पर 3–1 कन्नै जित्त हासल कीती।

<><><><><><>

Tennis

टेनिस च भारत दे उच्च वरियता प्राप्त खडारी सुमित नागल होर पेरुगिया चैलेंजर दे फाइनल च पुज्जी गे न। स्पेन दे बरनेबे जवाता मिराल्स हुंदे कन्नै कड़े मकाबले च जित्त हासल करने मगरा सुमित होरें फाइनल च थाहर बनाई। फाइनल च सुमित नागल हुंदा मकाबला इटली दे लूसियाना दारदेरी दे विजेता जर्मनी दे डेवेल कन्नै होग।

<><><><><><>